

四庫全書

經部

欽定四庫全書

儒門事親卷五

金 張從正 撰

瘡癰瘤腫五十一

夫大人瘡癰小兒赤瘤腫發之時疼痛不止內經曰夫諸痛痒瘡瘍皆生於心火可用一呪法禁之法者是心法呪曰

龍鬼流兮諸毒腫 癰瘡膿血甚被痛

忘心稱念大悲呪 三啞毒腫隨手消

右一氣念呪三遍望日月燈火取氣一口吹在瘡腫  
丹瘤之上右手在瘡上虛收虛撮三次左手不動每  
一氣念三遍虛收虛撮三次百無禁忌如用之時心  
正為是此法得於祖母韓氏相傳一百餘年用之救  
人百發百中若不食葷酒之人其法更靈病瘡腫者  
大忌雞猪魚兔發熱動風之物此法不得輕侮無藥  
處可用之

瘡腫丹毒五十二

夫大人小兒瘡腫丹毒發熱疼痛不止者有一法面北  
端想北海雪浪滔天冰山無際大寒嚴冷之氣取此  
氣一口吹在瘡腫處立止用法之人大忌五辛之菜  
五獸之肉所病之人切忌雞猪魚兔酒醋濕麵等物  
無藥之處可用此法救之

凍瘡五十三

夫凍瘡者因寒月行於冰雪中而得之有經年不愈用

陂野中淨土曝乾以大蒜搗如泥和土捏作餅子如  
大觀錢厚薄量瘡口大小而貼之泥餅子上以火艾  
灸之不計艾壯多少以泥乾為度去乾餅以換濕餅  
貼定灸之不問灸數多少有灸一二日者直至瘡痂  
內覺痒微痛是凍瘡活也然後口含漿水澄清用雞  
翎一二十莖縛作刷子於瘡口上洗淨以此而洗之  
後肌膚損痛也用軟帛拭乾次用木香檳榔散傅之  
夏月醫之大妙

金瘡五十四

夫一切刀箭所傷有刀箭藥用風化石灰一斤龍骨四兩二味為細末先於端四日採下刺薊菜於端干日五更合杵臼內搗和得所團作餅子若酒麴中心穿眼懸於背陰處陰乾搗羅為細末於瘡口上摻貼亦治裏外臙并諸瘡腫大効

又有呪法 呪曰

今日不祥 正被某傷 一禁不疼

二禁不痛 三禁不膿不作血

急急如律令奉勅攝

又每念一遍以右手收一遍收在左手中如此七遍  
則放手吹去却望太陽取氣一口吹在所傷處如陰  
晦夜間望北斗取氣亦得所傷之人大忌雞猪魚兔  
酒醋熱麵動風之物如食之則瘡必發

又一法 默想東方日出始取氣一口日出一半  
取氣一口日大圓滿取氣一口吹在所傷之處如此

三次則止用法之人並無所忌所傷之人禁忌同前可於  
無藥之處用之

誤吞銅鐵五十五

夫誤吞銅鐵以至羸瘦者宜用肥猪豚與葵菜羹同飧  
數頃則銅鐵自然下也神驗如不食葷腥者宜以調  
胃承氣湯大作其劑下之亦可也

魚刺麥芒五十六

夫魚刺麥芒一切竹木籤刺咽喉及鬚髮惹伴在咽嗑



中不能下者內經曰不因氣動而病生於外可用道  
藏經一呪法治之

呪曰

吾請老君東流順

老君奉勅攝攝攝

法毒水吾託大帝尊不到稱吾者各各現帝身急急  
如律令奉勅攝一氣念遍又以左手屈中指無名指  
作三山印印上坐淨水一盞右手掐卯文作金鎗印  
左手在下右手在上左手象地右手象天虛挽虛卓九  
次為定左足橫右足豎作丁字立如作法時望日月

燈火取氣一口吹在盞內此法百無禁忌用法之時以正神氣是也如所傷物下不可便與米湯米飯喫恐米粒誤入瘡口中潰作膿也姑以拌麵羹養之數日可也

蛇虫所傷五十七

夫大咬蛇傷不可便貼膏藥及生肌散之類謂毒氣不出也內經曰先治內而後治外可也當先用導水丸禹功散或通經瀉十餘行即時痛減腫消然後用膏

藥生肌散傅貼愈此是先治內而後治外之法也

杖瘡五十八

夫一切虫獸所傷及背瘡腫毒杖瘡焮發或透入裏者可服木香檳榔丸七十八丸至百丸或百五十九丸至二百丸生薑湯下過五七行量虛實加減則可矣

禁蝎五十九

夫禁蝎有一呪法 呪曰

玉女傳仙攝

勅斬蚺蜥滅

右如有蝎螫之人來求治者於蝎螫處望而取氣一口默念七遍怒著作法吹在蝎螫處內經曰蜂蠶之毒皆屬於火可用新水一盆浸之如浸不得處速以手帛蘸水搭之則痛止也用法之人大忌五厭肉

落馬墜井六十

夫一切男子婦人落馬墜井因而打撲便生心恙是痰涎發於上也內經曰不因氣動而病生於外可用三聖散空心吐訖如本人虛弱疲瘁可用獨聖散吐之

吐訖可服安魂寧魄之藥定志丸酸棗仁伏神之類  
是也

婦人月事沉滯六十一

夫婦人月事沉滯數月不行肌肉不減內經曰此名為  
瘦為沉也沉者月事沉滯不行也急宜服桃仁承氣  
湯加當歸大作劑服不過三服立愈後用四物湯  
補之更可用宣明方櫛榔丸

血崩六十二

夫婦人年及四十以上或悲哀太甚內經曰悲哀太甚則心系急心系急則肺布葉舉而上焦不通熱氣在中故經血崩下心系者血山也如久不愈則面黃肌瘦慎不可與燥熱之藥治之豈不聞血得熱而流散先以黃連解毒湯次以涼膈散四物湯等藥治之而愈四物者是涼血也乃婦人之仙藥也量虛實加減以意消息用之

腰跨疼痛六十三

夫婦人腰跨疼痛兩脚麻木惡寒喜暖者內經曰乃是風寒濕痺先可服除濕丹七八十九量虛實以意加減次以禹功散投之瀉十餘行清冷積水青黃涎沫為驗後以長流水同生薑棗煎五苓散服之風濕散而血氣和也

頭風眩運六十四

夫婦人頭風眩運登車乘船亦眩運眼澁手麻髮退健忘喜怒皆胸中有宿痰之使然也可用菴蒂散吐之

吐訖可用長流水煎五苓散大人參半夏丸無常服  
愈風餅子則愈矣

經血暴下六十五

夫婦人年及五十以上經血暴下者婦人經血終於七  
七之數數外暴下內經曰火主暴速亦因暴喜暴怒  
憂結驚恐之致然也慎不可作冷病治之如下峻熱  
之藥則死止可用黃連解毒湯以清於上更用蓮殼  
灰稜毛以滲於下然後用四物湯加玄胡散涼血和



經之藥是也

赤白帶下六十六

夫婦人赤白帶下或出白物如脂可服導水丸禹功散  
或單用無憂散量虛實加減瀉訖次用桂苓丸五苓  
散葶藶木香散同治濕治瀉法治之或用獨聖散上涌  
亦可也室女亦可

月事不來六十七

夫婦人月事不來室女亦可內經曰月事不來者是胞

脉閉也胞脉者屬火而絡於脬中令氣上迫肺心氣  
不得下通故月事不來也可用茶調散吐之吐訖可  
用玉燭散當歸散或三和湯桂苓白朮散柴胡飲子  
量虛實選而用之降心火益腎水開胃進食分陰陽  
利水道之藥是也慎勿服峻熱之藥若服之則變成  
肺痿骨蒸潮熱咳嗽咯膿嘔血而喘小便澀滯寢汗  
不已漸至形瘦脉大雖遇良醫亦成不救嗚呼人之  
死者豈為命耶

婦人無子六十八

夫婦人年及二三十者雖無病而無子經血如常或經血不調乃陰不升陽不降之故也可獨聖散上吐訖冷痰三二升後用導水丸禹功散瀉訖三五行及十餘行或用無憂散瀉十餘行次後喫葱醋白粥三五日胃氣既通腸中得實可服玉燭散更助以桂苓白朮丸散二藥是降心火益腎水既濟之道不數月而必有孕也

若婦人有癰閉遺溺嗑乾之諸證雖服藥針灸亦不能孕也蓋衝任督三脉之病故不治也表證見內證及熱論中

### 小產六十九

夫婦人半產俗呼曰小產也或三月或四五月皆為半產已成男女故也或因憂恐暴怒悲哀太甚或因勞力打撲傷損及觸風寒或著暴熱不可用黑神散烏金散之類內犯乾薑之故止可用玉燭散和經散

湯之類是也

大產七十

夫婦人大產十月滿足降誕者是也或臍腰痛乃敗血  
惡物之致然也舉世便作虛寒以燥熱治之誤人多  
矣難經曰諸痛為實實者熱也可用導水丸禹功散  
瀉五七行慎不可便服黑神散烏金散燥之同半產  
治之則可矣

產後心風七十一

夫婦人產後心風者則用調胃承氣湯一二兩加當歸  
半兩細剉用水三四盞同煎去滓分作二服大下三  
五行則愈如不愈三聖散吐之

乳汁不下七十二

夫婦人有天生無乳者不治或因啼哭悲怒鬱結氣溢  
閉塞以致乳脉不行用精猪肉清湯調和美食於食  
後調益元散五七錢連服三五服更用木梳梳乳周  
回百餘遍則乳汁自下也

又一法猪蹄湯調和美味服之乳汁亦下合用熟猪蹄四枚食之亦効

又一法鍼肩井二穴亦効

產後潮熱七十三

夫婦人產後一二日潮熱口乾可用新汲水調玉露散或冰水調服之亦可或服小柴胡湯加當歸及柴胡飲子亦可慎不可作虛寒治之

乳癰七十四

夫乳癰發痛者亦生於心也俗呼曰吹乳是也吹者風也風熱結薄於乳房之間血脉凝注久而不散潰腐為膿也可用一法禁之

呪曰 謹請東方護司族吹妳是灰妳子

右用之時當先問病人曰甚病病人荅曰吹妳取此氣一口但吹在兩手坎字文上用大姆指緊捏定面北立一氣念七遍吹在北方如此者三遍若作法時以左右二婦人面病人立於病乳上痛揉一二百數



如此亦三次則愈

雙身大小便不利七十五

夫婦人雙身大小便不利者可用八正散大作劑料除滑石加葵菜子煎服內經曰膀胱不利為癃癃者是小便閉而不通也如八正散加木香取効更捷經曰膀胱氣化則能出然後服五苓散三五服則愈矣

雙身病瘡七十六

夫雙身婦人病瘡可煎白虎湯小柴胡柴胡飲子等藥

如大便結硬可用大柴胡散微澹過不可大吐瀉恐傷其孕也內經曰夏傷於暑秋必病瘧

雙身傷寒七十七

夫雙身婦人傷寒時氣溫疫頭痛身熱可用升麻散一兩水半椀大煎劑料去滓分作二服先一服吐了後一服不吐次以長流水加生薑棗煎五苓散熱啜之汗出盡頭痛立止

身重瘖瘖七十八

夫婦人身重九月而瘖瘖不言者是腠生絡脉不相接也則不能言經曰無治也雖有此論可煎玉燭散二兩水一椀同煎至七分去滓放冷入蜜少許時時呷之則心火下降而肺金自清故能作聲也

懷身入難七十九

夫婦人懷身入難月可用長流水調益元散日三服欲其易產也產後自無一切虛熱血氣不和之疾如未八月則不宜服也以滑石滑胎故也

眉煉八十

夫小兒眉煉在面曰眉煉在耳曰輒耳在足曰靴痒此三者皆謬名也內經曰諸痛痒瘡瘍皆屬心火乃心火熱盛之致然也可用銚針刺之而出血一刺不愈當再刺之二刺則必愈矣內經云血實者宜決之決者破其血也眉煉者不可用藥傅之其瘡多痒則必爬若藥入眼則眼必損矣

牙疳八十一

夫小兒牙疳牙疔者齒齲也齲者是牙斷腐爛也上下  
牙者是手足陽明二經也或積熱於內或服銀粉芭  
莖大毒之藥入於腸胃乳食不能勝其毒毒氣循經  
而上至於齒斷齒斷牙縫為嫩薄之分反為害也可  
以麝香玉線子治之乳母臨卧當服黃連解毒湯一  
服疔病則愈

夜啼八十二

夫小兒夜啼不止者當用燈花一枚研細隨乳汁下併

三服則每服用燈花一枚服罷此藥於淨室中卧一  
兩日則止也

丹瘤八十三

夫小兒丹瘤浮赤走引或遍身者乃邪熱之毒在於皮  
膚以磁片撒出血則愈如不愈則以拔毒散掃三二  
十度必愈矣內經曰丹燦赤瘤火之色也相火之病  
也

疳眼八十四

夫小兒疳澁眼數日不開者乃肝木風熱之致然也可  
調服涼膈散數服眼開而愈

身瘦肌熱八十五

夫小兒身瘦肌熱面黃腹大或吐瀉腹有青筋兩脇結  
硬如椀之狀名乳癰癖俗呼曰妳脾是也乳癰得之  
綿帛大厚乳食傷多大熱則病生肌大飽則必傷於  
腸胃生於肌表者赤眼丹瘤疥癬癰瘡眉煉赤白口  
瘡牙疳宣爛及寒熱往來此乳母抱不下懷積熱薰

蒸之故兩手脉浮而數也傷於腸胃者吐瀉驚疳哽  
氣腹脹肌瘦面黃肚大筋直喜食泥土揉鼻竅頭髮  
作稔乳瓣不化此皆大飽之致然也久而不愈則成  
乳癰兩手脉沉而緊也此其辨也已上諸證皆乳母  
懷抱奉養過度之罪癖之疾可以丁香化痺散取過  
數服牛黃通膈丸甘露散益黃散等藥磨之如不愈  
者有揉脾一法

况曰 日精月華 助吾手法 剝斬滅消



驅毒勅攝

右用法之人每念一遍望日取氣一口吹在手心自揉之如小兒病在左壁上用法之人亦左手揉之在右壁以右手揉之亦吹在乳脾上令母揉之男孩兒用單日女孩兒用雙日大忌風雨陰晦產婦孝子見之用法之時宜於日中前晴明好日色則可矣

大小便不利八十六

夫小兒大小便不利通者內經曰三焦約也約者不行

也可用長流水煎八正散時時灌之候大小便利即止

久瀉不止八十七

夫小兒久瀉不止者至八九月間變為秋深冷利瀉泄清白時復撮痛乳瓣不化可用養脾丸丸如黍米大每服二三十丸米飲下日三服則愈若治蕩蕩之兒萬舉萬全富家且宜消息

通身浮腫八十八

夫小兒通身浮腫是水氣腫也小便不利者通小便則愈內經曰三焦閉溢水道不行水滿皮膚身體否腫是風乘濕之證也可用長流水加燈心煎五苓散時時灌之更於不透風暖處頻治汗出則腫消腫消則自愈內外兼治故也

發驚潮搐八十九

夫小兒三五歲時或七八歲至十餘歲發驚潮搐涎如拽鋸不省人事目瞪喘急將欲死者內經曰此皆得

於母胎中所授悸惕怕怖驚駭恐懼之氣故令小兒  
輕者為驚吊重者為癇病風搐為腹中積熱為臍風  
已上證候可用吐涎及吐之藥如吐訖宜用朱犀腦  
射清涼墜涎之藥若食乳之子母亦宜服安魂定魄  
之劑定志丸之類如婦人懷孕之日大忌驚憂悲泣  
縱得子必有諸疾

物哭不止九十

夫小兒物哭不止或一二日或三四日乃邪祟之氣湊

於心拗哭不止也有藏經一法以綿絹帶縛手足訖  
用三姓婦人淨驢槽卧小兒於其中不令傍人知而  
覷之候移時則拗哭自止也

身熱吐下九十一

夫小兒身熱吐下腹滿不進乳者可急用牛黃通膈丸  
下過四五行則愈

風熱涎嗽九十二

夫小兒風熱涎嗽可用通聖加半夏多煎少少服之不

過三五日愈

水瀉不止九十三

夫小兒水瀉不止可服五苓與益元各停用新水調下

一二錢服無時

瘡疥風癬九十四

夫小兒瘡疥風癬可用雄黃散加芒硝少許油調傅之  
如面上有瘡癬不宜擦藥恐因而入眼則損目必矣

甜瘡九十五

夫小兒甜瘡久不愈者俗呼曰香瘡是也多於面部兩  
耳前有一法令母口中嚼白米成膏子臨卧塗之不  
過三五上則愈矣小兒并乳母皆忌雞猪魚兔酒醋  
動風發熱之物如治甜指亦可

白瘡瘡九十六

夫小兒白瘡瘡者俗呼為雞糞禿者是也可用甜苳蔓  
龍頭不以多少河水浸之一宿以沙鍋熬取極苦汁  
濾去苳蔓以文武慢火熬成如稀餈狀盛於磁器中

可先剃頭去盡瘡痂死血出盡著河水洗淨却用熬下  
菰蔓膏子一水盞加半夏末二錢生薑自然汁一兩  
匙狗膽一枚同調不過三兩上立可大忌雞猪魚兔  
動風發熱之物

瘡疾不愈九十七

夫瘡疾連歲不愈者可用呪菓法治之菓者謂桃杏棗  
梨栗是也

呪曰



吾從東南來 路逢一池水 水裏一條龍

九頭十八尾 問伊食甚的 只喫瘡病鬼

右念一遍吹在菓子上念七遍吹七遍在上令病人  
於五更雞犬不聞時面東而立食訖於淨室中安困  
忌食瓜果葷肉熱物此法十治八九無藥處可以救  
人

腰痛氣刺九十八

夫一切男子婦人或因欬嗽一聲或因悲笑啼泣擡昇

重物以致腰痛氣刺不能轉側及不能出氣者可用  
不卧散嚏之汗出痛止如不食可用通經散導水丸  
瀉十餘行瀉訖服烏金丸和血丹痛減則止

赤瘤丹腫九十九

夫小兒有赤瘤丹腫先用牛黃通膈丸瀉之後用陽起  
石掃傳則丹毒自散如未散則可用銚鍼砭刺出血  
而愈

瘡疱癩疹一百


夫小兒瘡疱癰疹跌瘡丹燥等疾如遇火運勝時不可  
便用升麻湯解之升麻湯者是辛溫之劑止可用辛  
涼之劑解之太平時可用辛溫之劑發散後便可  
用涼膈加當歸白虎湯化斑湯玉露散煎服之甚者  
解毒湯調胃承氣湯投之古人云瘡瘍者首尾俱不  
可下此言誤人久矣豈不聞揚湯止沸釜底抽薪內  
經曰五寅五申歲多發此病此病少陽相火之歲也  
少陽客氣勝丹燥瘡疱癰疹之疾生矣又內經曰諸

痛痒瘡瘍皆屬於心火由是言之皆明心生不可用  
辛溫之劑發散以至熱勢轉增漸成臟毒下血咬牙  
搐搦為大熱之證明矣如白虎湯加人參涼膈加桔  
梗當歸不論秋冬但有瘡疤之證便可用之亦且瘡  
疤癰疹丹慄跌瘡者是天之一氣以傷人也且如瘡  
疤癰疹以少為吉以稠為凶希少者不服藥而自愈  
稠密者以寒涼藥捨死而治之十痊其二敝家親  
眷相知信服此藥獲効多矣

欽定四庫全書

儒門事親  
卷五

五



儒門事親卷五

欽定四庫全書

子部  
儒門事親卷六

詳校官太醫院思羅臣袁天錫

編修臣倉聖脈覆勛

總校官原任中允臣王燕緒

校對官中書臣呂雲棟

謄錄監生臣洪策

欽定四庫全書

儒門事親卷六

金張從正撰

風形

因驚風搐

新寨馬叟年五十九因秋次稅官杖六十得驚氣成風  
搐已三年矣病大發則手足顛掉不能持物食則令人  
代哺口目張眩唇舌嚼爛抖擻之狀如線引傀儡每發

市人皆聚觀夜卧發熱衣被盡蹙遍身燥痒中熱而反  
外寒久欲自盡手不能繩傾產求醫至破其家而病益  
堅叟之子邑中舊小吏也以父母病訊戴人戴人曰此  
病甚易治若隆暑時不過一涌再涌奪則愈矣今已秋  
寒可三之如未更刺膺穴必愈先以通聖散汗之繼服  
涌劑則痰一二升至晚又下五七行其疾小愈待五日  
再一涌出痰三四升如雞黃成塊狀如湯熱叟以手顫  
不能自探妻與代探咽噎腫傷昏瞶如醉約一二時許



稍稍省又下數行立覺足輕顫減熱亦不作足亦能步  
手能巾櫛自持匙筋未至三涌病去如濯病後但覺極  
寒戴人曰當以食補之久則自退蓋大疾之去衛氣未  
復故宜以散風導氣之藥切不可用熱劑溫之恐反成  
他病也

風搖反張二

呂君玉之妻年三十餘病風搖目眩角弓反張數日不  
食諸醫皆作驚風暗風風癇治之以天南星雄黃天麻

烏附用之殊無少効戴人曰諸風掉眩皆屬肝木曲直  
動搖風之用也陽主動陰主靜由火盛制金金衰不能  
平木肝木茂而自病先涌風痰二三升次以寒劑下十  
餘行又以錐鍼刺百會穴出血二盃立愈

飧泄三

趙明之米穀不消腹作雷鳴自五月至六月不愈諸醫  
以為脾受大寒故併與聖散子荳蔻丸雖止一二日藥力  
盡而復作諸醫不知藥之非反責明之不忘口戴人至

而笑曰春傷於風夏必飧泄飧泄者米穀不化而直過下出也又曰米穀不化熱氣在下久風入中中者脾胃也風屬甲乙脾胃屬戊己甲乙能尅戊己腸中有風故鳴經曰歲木太過風氣流行脾土受邪民病飧泄診其兩手脉皆浮數為病在表也可汗之直斷曰風隨汗出以火二盆暗置床之下不令病人見火恐增其熱給之入室使服涌劑以麻黃投之乃閉其戶從外鎖之汗出如洗待一時許開戶滅火一半須臾汗止泄亦止

因風鼻塞四

常仲明常於炎暑時風快處披露肌膚以求爽為風所賊三日鼻塞雖坐於暖處少通終不大解戴人使服通聖散入生薑葱根豈豉同煎三兩服大發汗鼻立通

風痰五

常仲明之子自四歲得風痰疾至十五歲轉甚每月發一兩次發必頭痛痛則擊數百拳出黃綠涎一兩盞方已比年發益頻目見黑花發作昏不知人三四日方省

諸醫皆用南星半夏化痰之藥終無一効偶遇戴人於  
滄水之南鄉戴人以雙解散發汗次以苦劑吐痰病去  
八九續以分劑平調自春至秋如此數次方獲全瘥

癩六

朱葛解家病癩疾求治於戴人戴人辭之待五六月間  
可治之時也今春初尚寒未可服藥我已具行裝到宛  
丘待五六月製藥朱解家以為託辭後戴人果以六月  
間到朱葛乃具大蒜浮萍等藥使人召解家曰藥已成

矣可來就治解為他醫所惑竟不至戴人曰向日我非託也以春寒未可發汗暑月易發汗內經論治癩疾自目眉毛再生針同發汗也但無藥者用針一汗可抵千針故高供奉採萍歌曰不居山兮不在岸採我之時七月半選甚癰風與癩風些小微風都不算豆淋酒內下三九鐵幙頭上也出汗噫文士相輕醫氏相疾文士不過自損醫氏至於害人其解家之謂與陽夏張主簿病癩十餘年眉鬚皆落皮膚皴澁如樹皮戴人斷之曰是

有汗者可治之當大發汗其汗出當臭其涎當腥乃置  
燠室中徧塞風隙以三聖散吐之汗出周身如卧水中  
其汗果粘臭不可聞痰皆腥如魚涎兩足心微有汗次  
以舟車丸瀆川散大下五七行如此數次乃瘳

手足風裂七

陽夏胡家婦手足風裂其兩目昏漫戴人曰厥陰所至  
為壘又曰鳴紊啓圻皆風之用風屬木木鬱者達之達  
謂吐也先令涌之繼以調胃承氣湯加當歸瀉之立効

胃脘痛八

一將軍病心痛不可忍戴人曰此非心痛也乃胃脘當心痛也內經曰歲木太過風氣流行民病胃脘當心而痛乃與神祐丸一百餘粒病不減或問曰此胃脘有寒宜溫補將軍素知戴人明了復求藥於戴人戴人復與神祐丸二百餘粒作一服大下六七行立愈

搗搦丸

黃如村一叟兩手搗搦狀如拽鋸冬日不能覆被適戴



人之舞陽道經黃如不及用藥針其兩手大指後中注穴上戴人曰自肘已上皆無病惟兩手搖擗左氏所謂風淫末疾者此也或刺後谿手太陽穴也屈小指握紋盡處是穴也

### 面腫風十

南鄉陳君俞將赴秋試頭項偏腫連一目狀若半壺其脈洪大戴人出視內經面腫者風此風乘陽明經也陽明氣血俱多風腫宜汗乃與通聖散入生薑葱根豈豉

同煎一大盞服之微汗次日以草莖鼻中大出血立消

驚風十一

戴人常曰小兒風熱驚搐乃常病也當搦時切戒把捉手足握持大急必半身不遂也氣血偏勝必痺其一臂漸成細瘦至老難治當其搐時置一竹篔簹鋪之涼地使小兒寢其上待其搐風力行徧經絡茂極自止不至傷人

風溫十二

陽夏賀義夫病傷寒當三日以裏醫者下之而成結胸

求戴人治之戴人曰本風溫證也不可下又下之太早  
故發黃結胸此已有瘀血在胸中欲再下之恐已虛惟  
一涌可愈但出血勿驚以茶調荻蒂散吐之血數升而  
衄且噎逆乃以巾捲小鍼而使枕其刃不數日平復

### 風水十三

張小一初病疥爬搔變而成腫喘不能食戴人斷為風  
水水得風而暴腫故遍身皆腫先令浴之乘腠理開發  
就燠室中用酸苦之劑加全蝎一枚吐之節次用藥末

至三錢許出痰約數升汗隨湧出腫去八九分隔一日  
臨卧向一更來又下神祐丸七十餘粒三次嚙之至夜  
半動一行又續下水煮桃紅丸六十丸以麝香湯下又  
利三四行後二三日再以舟車丸通經散及白朮散以  
調之愈

又

曹典史妻產後憂恚抱氣渾身腫繞陰器皆腫大小便  
如常其脉浮而大此風水腫也先以蠶水捺其痰以火

助之發汗次以舟車丸瀆川散瀉數行後四五日方用  
苦劑涌訖用舟車丸通經散過十餘行又六日舟車瀆  
川復下之末後用水煮桃紅丸四十餘丸不一月如故  
前後涌者二瀉凡四通約百餘行當時議者以為倒布  
袋法耳病再來則必死世俗只見塵中貨藥者用銀粉  
芑豈竭腫者暫去復來必死以為驚俗豈知此法乃內經

治鬱之玄

閱

兼此藥皆小毒其毒之藥豈有反害者哉但愈後忌慎

房室等事况風水不同從水無復來之理

小兒風水十四

鄧之營兵秋家小兒病風水諸醫用銀粉粉霜之藥小  
洩反澁飲食不進頭腫如腹四肢皆滿狀若水晶家人  
以為勉強求治於戴人戴人曰此證不與壯年同壯年  
病水者或因留飲及房室此小兒纔七歲乃風水證也  
宜出汗乃置燠室以屏帳遍遮之不令見火若內火見  
外火必昏憤也使大服胃風湯而浴之浴訖以布單重

覆之凡三五重其汗如水腫乃減五分隔一二日乃依前治之汗出腫減七分乃二汗而全減尚未能食以擯榔丸調之兒已喜笑如常日矣

### 腎風十五

桑惠民病風面黑色畏風不敢出爬搔不已眉毛脫落作癩醫三年一日戴人到棠谿來求治於戴人戴人曰非癩也乃出素問風論曰腎風之狀多汗惡風脊痛不能正立其色焔面疣然浮腫今公之病腎風也宜先刺

其面大出血其血當如墨色三刺血變色矣於是下針  
自額上下鉗鍼直至頤頂皆出血果如墨色徧腫處皆  
鍼之惟不鍼目銳眥外兩旁蓋少陽經此少血多氣也  
隔日又鍼之血色乃紫二日外又刺其血色變赤初鍼時  
痒再刺則額覺痛三刺其痛不可任蓋邪退而然也待  
二十餘日又輕刺一遍方已每刺必以冰水洗其面血  
十日黑色退一月面稍赤三月乃紅白但不服除根下熱  
之藥病再作戴人在東方無能治者



勞風十六

戴人見一男子目下腫如卧蚕狀戴人曰目之下陰也水亦陰也腎以為水之主其腫至於目下故也此由房室交接之時勞汗遇風風入皮膚得寒則閉風不能出與水俱行故病如是不禁房則死

中風十七

高評事 中風稍緩張令涌之後服鉄彈丸在普濟加減方中或問張曰君常笑人中風服鉄彈丸今以用之何

也張曰此收後之藥也今人用之於大勢方來之時正猶蚍蜉撼大樹不識次第故也

暑形

中暑十八

小鄭年十五田中中暑頭痛困卧不起戴人以雙解散汗之又以米醋湯投之未解薄晚又以三花神祐丸大下之遂愈

又

張叟年七十一暑月田中因饑困傷暑食飲不進時時嘔吐口中常流痰水腹脇作痛醫者概用平胃散理中丸導氣丸神効又加鍼灸皆云胃冷乃問戴人戴人曰痰屬胃胃熱不收故流痰水以公年高不敢上涌乃使一筋探之不藥而吐之痰涎一升次用黃連清心散導飲丸玉露散以調之飲食加進惟大便秘以生薑大棗煎調胃承氣湯一兩奪之遂愈

瘡瘡十九

故息城一男子病瘧求治於戴人診兩手脉皆沉伏而有力內有積也此是肥氣病者曰左脇下有肥氣腸中作痛積亦痛形如覆杯間發止今已三年祈禳避匿無所不至終不能療戴人曰此瘕瘕也以三花神祐丸五七十丸以冷水送過五六行次以冷水止之冷主收斂故也濕水既盡一二日煎白虎湯作頓啜之瘕猶不愈候五六日吐之以常山散去冷痰涎水六七次若醜漿次以柴胡湯和之間用妙功丸磨之瘕悉除

火形

馬刀二十

襄陵馬國卿病左乳下二脇間期門穴中發癰堅而不潰痛不可忍醫瘍者皆曰乳癰或曰紅系漏或曰覲心瘡使服內托散百日又服五香連翹湯數月皆無驗國卿偃俛而來求治于戴人遇諸市戴人見之曰此馬刀癰也足少陽膽經之病出靈樞十二經以示之其壯如馬刀故曰馬刀堅而不潰乃邀之於食肆中使食水浸

湯餅國卿曰稍覺緩次日先以滄鹽上涌又以涼劑滌去熱勢約數十行腫已散矣

又朱葛黃家妾左脇病馬刀癰增寒發痛已四五日矣戴人適避暑於寺中來乞藥戴人曰此足少陽膽經病也少血多氣堅而不潰不可急攻當以苦劑涌之以五香連翹湯托之既而痛止然癰根未散有一盜醫過見之曰我有妙藥可潰而為膿不如此何時而愈既雜毒藥痛不可忍外寒內熱嘔吐不止大便黑色飲食不下號

呼悶亂幾至于死諸姑惶懼夜投戴人戴人曰當尋元醫者余不能治其主母亦來告至于再三戴人曰脇間皮薄肉淺豈可輕用毒藥復令洗出以涼劑下之痛立止腫亦消

項瘡二十一

戴人在西華寄於夏官人宅忽項上病一瘡狀如白頭瘡腫根紅硬以其微小不慮也忽遇一故人見邀以羊羔酒飲雞魚醢蒜皆在焉戴人以其故舊不能辭又忘

其禁忌是夜瘡疼痛不可忍項腫及頭口發狂言因見鬼神夏君甚懼欲報其家戴人笑曰請無慮來日當平乃以酒調通經散六七錢下舟車丸百餘粒次以熟麵羹投之上涌下泄一時齊作合去半盆明日日中瘡腫已平一二日腫出而愈夏君見大奇之

伐指痛二十二

麻先生妻病伐指痛不可忍酒調通經散一錢半夜大吐吐畢而痛減余因歎曰向見陳五曾病此醫以為小



蟲傷或以草上有毒物手因觸之遷延數月膿盡方已  
以今日觀之可以大笑

療癰二十三

一婦人病癰癰延及胸臆皆成大瘡相連無好皮肉求  
戴人療之戴人曰火淫所勝治以鹹寒命以滄鹽吐之  
一吐而著痂次用涼膈散解毒湯等劑皮肉乃復如初

咽喉腫塞二十四

一婦人病咽喉腫塞漿粥不下數日腫不退藥既難下

鍼亦無功戴人以當歸荊芥甘草煎使熱嗽之以冷水  
拔其兩手不及五六日痛減腫消飲食如故咽喉之病  
甚急不可妄用鍼藥

舌腫二十五

南隣朱老翁年六十餘歲身熱數日不已舌根腫起和  
舌尖亦腫腫至滿口比元舌大二倍一外科以燔鍼刺  
其舌兩旁下廉泉穴病勢轉凶將至顛囈戴人曰血實  
者宜決之以鉗鍼磨令鋒極尖輕砭之日砭八九次血

出約一二盞如此者三次漸而血少痛減腫消夫舌者心之外候也心主血故血出則愈又曰諸痛痒瘡瘍皆屬心火燔鍼艾火是何義也

腰膝痛二十六

戴人女僮冬間自途來面赤如火至隱陽病腰膝大痛裏急後重痛則見鬼神戴人曰此少陽經也在身側為相火使服舟車丸通經散瀉至數盆病猶未瘥人皆怪之以為有祟戴人大怒曰驢鬼也復令調胃承氣湯二

兩加牽牛頭末一兩同煎服之大下數十行約一二缶  
方捨其杖策但發渴戴人恣其飲水西茱梨柿等戴人  
曰凡治火莫如冰水天地之至陰也約飲水一二桶猶  
覺微痛戴人乃刺其陽陵穴以伸其滯足少陽膽經之  
穴也自是方寧女僮自言此病每一歲須瀉五七次今  
年不曾瀉故如是也常仲明悟其言以身有濕病故一  
歲亦瀉十餘行病始已此可與智者言難與愚者論也

狂二十七

一叟年六十值徭役煩擾而暴發狂口鼻覺如蟲行兩  
手爬搔數年不已戴人診其兩手脉皆洪大如絙繩斷  
之曰口為飛門胃為賁門曰口者胃之上源也鼻者足  
陽明經起於鼻交頰之中旁納太陽下循鼻柱交人中  
環脣下交承漿故其病如是夫徭役煩擾便屬火化火  
乘陽明經故發狂故經言陽明之病登高而歌棄衣而  
走罵言不避親疏又况肝主謀膽主決徭役迫遽則財  
不能支則肝屢謀而膽屢不能決屈無所伸怒無所泄

心火礧礧遂乘陽明金然胃本屬土而肝屬木膽屬相  
火火隨木氣而入胃故暴發狂乃命置燠室中涌而汗  
出如此三次內經曰木鬱則達之火鬱則發之良謂此  
也又以調胃承氣湯半斤用水五升煎半沸分作三服  
大下二十行血水與瘀血相雜而下數升取之乃康以  
通聖散調其後

痰厥二十八

一夫病痰厥不知人牙關緊急諸藥不能下候死而已

戴人見之問侍病者口中曾有涎否曰有戴人先以防  
風藜蘆煎湯調菴蒂末灌之口中不能下乃取長蛤甲  
磨去刃以紙裹其尖灌於右鼻竅中啞然下咽有聲復  
灌其左竅亦然戴人曰可治矣良久涎不出遂以砒石  
一錢又投之鼻中忽偃然仰面似覺有痛斯須吐噦吐  
膠涎數升頗腥砒石尋常勿用以其病大非如此莫能  
動然無菴蒂亦不可使用宜消息之大凡中風涎塞往  
往止斷為風專求風藥靈寶至寶誤人多矣劉河間治

風捨風不論先論二火故令將此法實於火形中

滑泄乾嘔二十九

麻先生妻當七月間病臟腑滑泄以去濕降火之藥治之少愈後腹脹及乳痛狀如吹乳頭重壯熱面如渥丹寒熱往來噎乾嘔逆胃脇痛不能轉側耳鳴食不可下又復瀉余欲瀉其火臟腑已滑數日矣欲以溫劑止利又禁上焦已熱實不得其法使人就諸葛寺禮請戴人比及戴人至因檢劉河間方惟益元散正對此證能降



火解表止渴利小溲定利安神以青黛薄荷末調二升  
置之枕右使作數次服之夜半徧身出冷汗如洗元覺  
足冷如冰至此足大煖頭頓輕肌涼痛減嘔定痢止及  
戴人至余告之已解戴人曰益元固宜此是少陽證也  
能使人寒熱徧劇他經縱有寒熱亦不至甚既熱而有  
痢不欲再下何不以黃連解毒湯服之乃令診脉戴人  
曰娘子病來心常欲痛哭為快否婦曰欲如此余亦不  
知所謂戴人曰少陽相火凌燄肺金金受屈制無所投

告肺主悲但欲痛哭而為快也麻先生曰余家諸親無不敬服脉初洪數有力自服益元散後已平又聞戴人之言使以當歸芍藥以解毒湯中味數服之大瘥矣

笑不止三十

戴人路經古亳逢一婦病喜笑不止已半年矣眾醫治者皆無藥術矣求治于戴人戴人曰此易治也以滄鹽成塊者二兩餘用火燒令通赤放冷研細以河水一大碗同煎至三五沸放溫分三次啜之以釵探於咽中吐

去熱痰五升次服大劑黃連解毒湯是也不數日而  
笑定矣內經曰神有餘者笑不休此所謂神者心火是  
也火得風而成焰故笑之象也五行之中惟火有笑矣

膈食中滿三十一

遂平李官人妻病咽中如物塞食不下中滿他醫治之  
不効戴人診其脉曰此痰膈也內經曰三陽結為膈王  
啟玄又曰格陽云陽盛之極故食格拒而不入先以通  
經散越其一半後以舟車丸下之凡三次食已下又以

菘蒂散再越之健啖如昔日矣

目盲三十二

戴人女僮至西華目忽暴盲不見物戴人曰此相火也  
太陽陽明氣血俱盛乃刺其鼻中攢竺穴與頂前五穴  
大出血目立明

小兒悲哭不止三十三

一小兒悲哭彌日不休兩手脉弦而緊戴人曰心火甚  
而乘肺肺不受其屈故哭肺主悲王太僕云心爍則痛

甚故爍甚悲亦甚令浴以溫湯漬形以為汗也肺主皮毛汗出則肺熱散矣浴止而啼亦止仍命服涼膈散加當歸桔梗以竹葉生薑朴硝同煎服瀉膈中之邪熱

小兒手足搐搦三十四

李氏一小兒病手足搐搦以示戴人戴人曰心火勝也勿持捉其手當從搐搦此由乳母保抱太極所致乃令掃淨地以水洒之乾令復洒之令極濕俛卧兒于地上良久渾身轉側泥濘皆滿仍以水洗之少頃而瘥

目赤三十五

李民範目常赤至戊子年火運君火司天其年病目者  
往往暴盲運火炎烈故也民範是年目大發遂遇戴人  
以芩蒂散涌之赤立消不數日又大發其病之來也先  
於左目內眥赤發牽睛狀如鋪麻左之右次銳眥發亦  
左之右赤貫瞳子再涌之又退凡五次交亦五次皆涌  
又刺其手中出血及頭上鼻中皆出血上下中外皆奪  
方能戰退然不敢觀書及見日張云當候秋涼再攻則

愈火方旺而在皮膚雖攻其裏無益也秋涼則熱漸入裏方可擒也惟宜暗處閉目以養其神水暗與靜屬水明與動屬火所以不宜見日也蓋民範因初愈後曾冒暑出門故痛連發不愈如此涌泄之後不可常攻使服黍粘子以退翳方在別集

熱形

沙石淋三十六

酒監房善良之子年十三病沙石淋已九年矣初因瘡

疹餘毒不出作便血或告之令服太白散稍止後又因積熱未退變成淋悶每發則見鬼神號則驚隣適戴人客鄧牆寺以此病請戴人曰諸醫作腎與小腸病者非也靈樞言足厥陰肝之經病遺溺閉癰閉謂小溲不行癰為淋瀝也此乙木之病非小腸與腎也木為所抑火來乘之故熱在脬中下焦為之約結成沙石如湯瓶煎煉日久熬成湯鹼今夫羊豕之脬吹氣令滿常不能透豈真有沙石而能漏者邪以此知前人所說服五石丸



散而致者恐未盡然內經曰木鬱則達之先以芫蒂散  
越之次以八政散加湯鹼等分頓啜之其沙石自化而  
下

又屈村張氏小兒年十四歲病約一年半矣得之麥秋  
發則小腸大痛至握其峻跳躍旋轉號呼不已小溲數  
日不能下下則成沙石大便秘澁肛門脫出一二寸諸  
醫莫能治聞戴人在朱葛寺避暑乃負其子而哀請戴  
人戴人曰今日治今日効時日在辰巳間矣以調胃承

氣僅一兩加牽牛頭末三錢汲河水煎之令作三五度  
煎之又服苦末丸如芥子許六十粒日加晡上涌下泄  
一時齊出有膿有血涌瀉既覺定令飲新汲水一大盞  
小溲已利一二次矣是夜凡飲新水二三十遍病去九  
分止哭一次明日困卧如醉自晨至暮猛然起走索食  
于母歌笑自得頓釋所苦繼與太白散八正散等調一  
日大瘥恐暑天失所養留五日而歸戴人曰此下焦約  
也不吐不下則下焦何以開不令飲水則小溲何以利

大抵源清則流清也

又栢亭劉十三之子年六歲病沙石淋戴人以苦劑三  
涌之以益腎散三下之立愈

膏淋三十七

鹿邑一闕閱家有子二十三歲病膏淋三年矣鄉中醫  
不能治往京師徧訪多作虛損補以溫燥灼以鍼艾無  
少減聞戴人僑居滬東見戴人曰惑蠱之疾也亦曰白  
淫實由少腹寬熱非虛也可以涌以泄其人以時暑憚

其法峻不決者三日浮屠一僧曰予以有暑病近覺頭痛戴人曰亦可涌願與君同之母畏也於是涌痰三升色如黑礬汁內有死血并黃綠水又瀉積穢數行尋覺病去方其來時面無人色及治畢次日面如醉戴人慮其暑月路遠又處數方使歸以自脩云

二陽病三十八

常仲明病寒熱往來時欬一二聲面黃無力懶思飲食夜多寢汗日漸變削諸醫作虛損治之用二十四味燒

肝散庶茸牛膝補養二年口中痰出下部轉虛戴人斷  
之曰上實也先以涌劑吐痰二三升次以柴胡飲子降  
火益水不月餘復舊此證名何乃內經中曰二陽病也  
二陽之病發心脾不得隱曲心受之則血不流故女子  
不月脾受之則味不化故男子少精此二證名異而實  
同仲明之病味不化也

小兒面上赤腫三十九

黃氏小兒面赤腫兩目不開戴人以銚鍼刺輕砭之除

兩目尖外亂刺數十鍼出血三次及愈此法人多不肯從必欲治病不可謹護

頭熱痛四十

丹霞僧病頭痛常居暗室不敢見明其頭熱痛以布圍其頭上置冰於其中日易數次熱不能已諸醫莫識其證求見戴人戴人曰此三陽蓄熱故也乃置炭火於煖室中出汗涌吐三法併行七日方愈僧顧從者曰此神仙手也

勞嗽四十一

馳口鎮一男子年二十餘歲病勞嗽數年其聲欲出不  
出戴人問曰曾服藥否其人曰家貧未嘗服藥戴人曰  
年壯不妄服藥者易治先以苦齋涌之次以舟車瀉川  
大下之更服重劑果瘥

一田夫病勞嗽一涌一泄已減大半次服人參補肺湯  
臨卧更服檳榔丸以進食

又東門高三郎病嗽一年半耳鳴三月矣嗽膿血面多

黑點身表俱熱喉中不能發聲戴人曰嗽之源心火之勝也秋傷於濕冬生欬嗽冬水既旺水濕相接隔絕於心火火不下降反而炎上肺金被爍發而為嗽金煨既久聲反不發醫者補肺腎皆非也戴人令先備西芩冰雪等物其次用涌泄之法又服去濕之藥病日已矣

勞嗽咯血四十二

潁陽劉氏一男子年二十餘歲病勞嗽咯血吐唾粘臭不可聞秋冬少緩春夏則甚寒熱往來日晡發作狀如



瘖瘡寢汗如水累服麻黃根敗蒲扇止汗汗自若也又服寧神散寧肺散止嗽嗽自若也戴人先以獨聖散涌其痰狀如雞黃汗隨涌出昏憤三日不省時時飲以涼水精神稍開飲食加進又與人參半夏丸桂苓甘露散服之不經數日乃愈

吐血四十三

岳八郎常日嗜酒偶大飲醉吐血近一年身黃如橘昏憤發作數日不省漿粥不下強直如厥兩手脉皆沉細

戴人視之曰脉沉細者病在裏也中有積聚用舟車丸百餘粒濬川散五六錢大下十餘行狀如葵菜汁中燥糞氣穢異常忽開兩目伸挽問左右曰我緣何至此左右曰你吐血後數日不省得戴人治之乃醒自是五六日必以瀉凡四五次其血方止但時欬一二聲潮熱未退以涼膈散加桔梗當歸各秤二兩水一大盃加老竹葉入蜜少許同煎去滓時時呷之間與人參白虎湯不一月復故

嘔血四十四

崇谿李民範初病嗽血戴人以調胃湯一兩加當歸使服之不動再以舟車丸五六十粒過三四行又嘔血一椀若庸工則必疑不再宿又與舟車丸百餘粒通經散三四錢大下之過十餘行已愈過半仍以黃連解毒湯加當歸煎服之次以草莖鼻中出血半升臨晚又用益腎散利數行乃愈

因藥燥熱四十五

高爍巡檢之子八歲病熱醫者皆為傷冷治之以熱藥  
攻矣欲飲水水禁而不與內水涸竭煩燥轉生前後皆  
閉口鼻俱乾寒熱往來咳嗽時作遍身無汗又欲灸之  
適遇戴人戴人責其母曰重裯厚被煖炕紅爐兒已不  
勝其熱矣尚可灸乎其母謝以不明戴人令先服人參  
柴胡飲子連進數服下爛魚腸之類臭氣異常渴欲飲  
水聽其所欲冰雪凉水連進數杯節次又下三四十行  
大熱方去又與牛黃通膈丸復下十餘行兒方大痊前

後約五十餘行略無所困冰雪水飲至一斛向灸之當如何哉

肺癰四十六

武陽仇天祥之子病發寒熱諸醫作骨蒸勞治之半年病愈甚以禮來聘戴人戴人往視之診其兩手脉尺寸皆潮於關關脉獨大戴人曰癰象也問其乳媪曾有痛處否乳媪曰無戴人令兒去衣舉其兩手觀其兩脇下右脇稍高戴人以手側按之兒移身乃避之按其左脇

則不避戴人曰此肺部有癰也非肺癰也若肺癰已吐  
膿矣此不可動止可以藥托其裏以待自破家人皆疑  
之不以為然服藥三日右脇有三點赤色戴人連辭云  
此兒之病若早治者談笑可已今已失之遲然破之後  
方驗其生死矣若膿黃赤白者生也膿青黑者死也遂  
辭而去私告天祥之友李簡之曰數月之後即此兒必  
有一證也其證乃死矣肺死於已至期而頭眩不舉不  
數日而死也其父曰群醫治之斷為骨蒸證戴人獨言

其肺有癰也心終疑之及其死家人輩以火焚其棺既  
燃天祥以杖破其脇下果出青黑膿一碗天祥仰天哭  
曰諸醫誤殺吾兒矣

痿四十七

宛丘營軍校三人皆病痿積年不瘥腰下已腫痛不舉  
遍身瘡赤兩目昏暗唇乾舌燥求療于戴人戴人欲投  
瀉劑二人不從為他醫溫補之藥所惑皆死其同病有  
宋子王者俄省曰彼已熱死我其改之敬邀戴人戴人

曰公之疾服熱藥久矣先去其藥邪然後及病邪可下  
三百行子玉曰敬從教先以舟車丸瀆川散大下一盆  
許明日減三分兩足舊不仁是日覺痛痒累至三百行  
始安戴人曰諸痿獨取陽明陽明者胃與大腸也此言  
不止謂鍼也鍼與藥同也

口瘡四十八

一男子病口瘡數年上至口中至咽嗝下至胃脘皆痛  
不敢食熱物一涌一泄一汗十去其九次服黃連解毒



湯不十餘日皆釋

虛勞四十九

西華東茂之病虛勞寢汗面有青黃色自膝以下冷痛無汗腹中燥熱醫以薑附補之五晦朔不令飲水又禁梳頭作寒治之請於戴人戴人曰子之病不難愈難於將護恐愈後陰道轉茂子必不慎東生曰不敢戴人先以舟車丸瀆川散下五七行心火下降覺渴與冰水飲之又令澡浴數日間面紅而澤後以河水煮粥溫養脾

胃河水能利小溲又以活血當歸丸人參柴胡散五苓散木香白朮散調之病大瘥寢汗皆止兩足日煖食進戴人常曰此本肺痺當以涼劑蓋水之一物在目為涼在皮為汗在下為小溲穀多水少為常無水可乎若禁飲水必內竭內竭則燥熱生焉人若不渴與水亦不肯飲之矣東生既愈果忘其戒病復作戴人已去乃殂

心痛五十

酒官楊仲臣病心氣痛此人常好飲酒初飲三二杯必

逶走跛懶兩足三五十次其酒稍散方能復席飲至前  
量一醉必五七次至明嘔青黃水數日後變魚腥臭六  
七日始安戴人曰宜涌乃吐蟲一條赤黃色長六七寸  
口目鼻皆全兩目膜瞞狀如蛇類以鹽淹乾示人

傷寒極熱五十一

戴人之僕常與隣人同病傷寒俱至六七日下之不通  
隣人已死僕發熱極投於井中撈出以汲水貯之檻使  
坐其中適戴人遊他方家人偶記戴人治法曰傷寒三

下不通不可再攻便當涌之試服瓜蒂散良久吐膠涎  
三椀許與宿食相雜在地狀如一帚頓快乃知世醫殺  
人多矣戴人之女僮亦嘗吐一吏傷寒吐訖使服太白  
散甘露散以調之

失笑五十二

戴人之次子自出妻之後日瘦語如瓮中此病在中也  
常撚第三指失笑此心火也約半載日飲冰雪更服涼  
劑戴人曰惡雪則愈矣其母懼其大寒戴人罵曰汝親

也吾用藥如鼓之應桴尚惡涼藥宜乎世俗之謗我也  
至七月厭水不飲病日解矣

赤目五十三

安喜趙君玉目暴赤腫點洗不退偶思戴人語曰凡病  
在上者皆宜吐乃以茶調散涌之一涌赤腫消散君玉  
歎曰法之妙其迅如此乃知法不遠人自遠法也

目眾五十四

青州王之一子年十餘歲目赤多淚衆工無効戴人見

之曰此兒病目累當得之母腹中被驚其父曰妊娠時在臨清被圍戴人令服菴蒂散加鬱金上涌而下泄各去涎沫數升人皆笑之其母亦曰兒腹中無病何吐瀉如此至明日其目耀然爽明李仲安見而驚曰奇哉此法戴人其日又與頭上出血及眉上鼻中皆出血吐時次用通經散二錢舟車丸七十粒自吐却少半又以通經散一錢投之明日又以舟車丸三十粒投之下十八行病更不作矣

庖後嘔吐五十五

河門劉光濟之子纔二歲病庖後嘔吐發昏用丁香豈  
寇之類不効適麻先生寄其家乃謂光濟曰余有小方  
無毒人皆知之公肯從乎光濟曰先生之言必中於理  
何敢不從麻先生曰劉河間常言涼膈散可治瘡庖張  
戴人用之如神况內經言少陽所至為嘔涌少陽者相  
火也非寒也光濟欣而從之此日利二行適王德秀自  
外入聞其利之也乃曰瘡庖首尾不可下麻自悔其多

言也業已然姑待之比至食時下黃涎一合日午問之  
兒已索遊於街矣

熱厥頭痛五十六

彭吳張叟年六十餘歲病熱厥頭痛以其用涌藥時已  
一月間矣加之以火其人先利臟腑年高身困出門見  
日而仆不知人家人驚惶欲揉撲之間戴人戴人曰大不  
可擾續與西瓜涼水蜜雪少頃而蘇蓋病人年老涌泄  
目脉易亂身體內有炎火外有太陽是以跌耳若是擾



之便不救矣惟安定神思以涼水投之待之以靜靜便屬水自然無事若他醫必惑足以知戴人之諳練

產前喘五十七

武安胡產祥之妻臨難月病喘以涼膈散二兩四物湯二兩朴硝一兩分作二服煎令冷服之一服病減大半次又服之病痊効矣產之後第六日血迷又用涼膈散二兩四物湯三兩朴硝一兩都作一服大下紫黑水其人至今肥健戴人常曰孕婦有病當十月九月內朴硝

無碍八月者當忌之七月却無妨謂陽月也十月者已成形矣

血崩五十八

孟官人母年五十餘歲血崩一載僉用澤蘭丸黑神散保安丸白薇散補之不効戴人見之曰天癸已盡本不當下血蓋血得熱而流散非寒也夫女子血崩多因大悲哭悲甚則肺葉布心系為之恐血不禁而下崩內經曰陰虛陽搏之為崩陰脉不足陽脉有餘數則內崩血

乃下流舉世以虛損治之莫有知其非者可服大劑大劑者黃連解毒湯是也次以揀香附子二兩炒白芍藥二兩焙當歸一兩焙三味同為細末水調下又服檳榔丸不拘日而安

婦人二陽病五十九

一婦月事不行寒熱往來口乾頰赤喜飲旦暮聞欬一二聲諸醫皆云經血不行宜蠶虫水蛭乾漆硃砂元青紅娘子沒藥血竭之類惟戴人不然曰古方中雖有此

法奈病人服之必臍腹發痛飲食不進乃命止藥飲食  
稍進內經曰二陽之病發心脾心受之則血不流故女  
子不月既心受積熱宜抑火升水流濕潤燥開胃進食  
乃涌出痰一二升下泄水五六行濕水上下皆去血氣  
自行沸流月事不為水濕所隔自依期而至矣亦不用  
蠶虫水蛭之類有毒之藥如用之則月經縱來小澁反  
閉他證生矣凡精血不足當補之以食大忌有毒之藥  
偏勝而成天閼

月閉寒熱六十

一婦年三十四歲經水不行寒熱往來面色痿黃唇焦  
頰赤時欬三兩聲向者所服之藥黑神散烏金丸四物  
湯燒肝散鱉甲散建中湯寧肺散鍼艾百千病轉劇家  
人意倦不欲求治戴人憫之先涌痰五六升午前涌畢  
午後食進餘證悉除後三日復輕涌之又去痰一二升  
食進益不數日又下通經散瀉訖一二升後數日去死  
皮數重小者如麩片大者如葦膜不一月經水行神氣

大康矣

惡寒實熱六十一

一婦身冷脉微食沸熱粥飯六月重衣以狐帽蒙其首  
猶覺寒泄注不止常服薑附硫黃燥熱之劑僅得平和  
稍用寒涼其滿轉增三年不愈戴人診其兩手脉皆如  
絙繩有力一息六七至脉訣曰六數七極熱生多以涼  
布拂心次以新汲水淋其病處婦乃叫殺人不由病者  
令人持之復以冷水淋其三四十桶大戰汗出昏困一

二日而向之所惡皆除此法華元化已曾用世無知者  
遇寒手熱六十二

常仲明之妻每遇冬寒兩手熱痛戴人曰四肢者諸陽  
之本也當夏時散越而不痛及乎秋冬收斂則痛以三  
花神祐丸大下之熱遂去

嘔逆不食六十三

栢亭王論夫本因喪子憂抑不思飲食醫者不察以為  
胃冷血燥之劑盡用之病變嘔逆而瘦求治於戴人一

視涌泄而愈愈後忘其禁忌病復作大小便俱秘臍腹撮痛嘔吐不食一日大小便不通十有三日復問戴人戴人曰令先食葵羹菠菱菜猪羊血以潤燥開結次與導飲丸二百餘粒大下結糞又令恣意飲水水數升繼搜風丸桂苓白朮散以調之食後服導飲丸三十餘粒不數日前後皆通藥止嘔定食進戴人臨別又留潤腸丸以防復結又留滌腸散大閱則用之凡服大黃牽牛四十餘日方瘳論夫自歎曰向使又服向日熱藥已非



今日人矣一僧問戴人云腸者暢也不暢何以此一  
句  
儘多

瘕癪六十四

一省掾背項常有瘕癪愈而復生戴人曰太陽血有餘  
也先令涌泄之次於委中以鉞鍼出紫血病更不復作  
也

牙痛六十五

澤州李繼之忽病牙痛皺眉不語藥景先見之曰何不

藥也曰牙痛藥曰曾記張戴人云陽明經熱有餘也宜  
大下之乃付舟車丸七十粒服畢遇數知交留飲強飲  
熱酒數杯藥為熱酒所發盡吐之吐畢而痛止李大笑  
曰戴人神仙也不三五日又痛再服前藥百餘粒大下  
數行乃愈

淋六十六

戴人過息城一男子病淋戴人令頓食鹹魚少頃大渴  
戴人令恣意飲水然後以藥之淋立通淋者無水故澀

也

口臭六十七

趙平尚家一男子年二十餘歲病口中氣出臭如發廁  
雖親戚莫肯與對語戴人曰肺金本主腥金為火所煉  
火主焦臭故如是也久則成腐腐者腎也此極熱則反  
無水化也病在上宜涌之先以茶調散涌而去其七分  
夜用舟車丸瀦川散下五七行比旦而臭斷嗚呼人有  
病口臭而終其老者世訛以為肺系偏而與胃相通故

臭妄論也

濕形

疝六十八

汝南司候李審言因勞役王事飲水坐濕地乃濕氣下行流入胛囊大腫痛不可忍以金鈴川練子等藥不効求治于戴人曰可服泄水丸審言感之又數日痛不可堪竟從戴人先以舟車丸瀆川散下青綠沫十餘行痛止次服茴香丸五苓以調之三日而腫退至老更不作

夫疝者乃肝經也下青沫者肝之色也

水疝六十九

律科王敏之病水疝其法在於寒形中

留飲七十

郭敬之病留飲四日浮腫不能食脚腫連腎囊痛先以苦劑涌之後以舟車丸瀆川散瀉之病去如拾遺

又棠谿張鳳村一田叟姓楊其病嘔酸水十餘年本留飲諸醫皆以燥劑燥之中腕臍脇以火艾燔鍼刺之瘡

未嘗合戴人以苦劑越之其涎如膠乃出二三升談笑而愈

黃疸七十一

蔡寨成家一童子年十五歲病疸一年面黃如金遍身浮腫乏力惟食鹽與焦物戴人以茶調散吐之涌涎一盂臨晚又以舟車丸七八十粒通經散三錢下四五行待六七日又以舟車丸瀉川散下四五行鹽與焦物見而惡之面色變紅後再以茶調散涌之出痰二升方能愈

矣

又一男子作贅偶病疸善食而瘦四肢不舉面黃無力其婦翁欲棄之其女子不肯曰我已生二子矣更適他乎婦翁本農者召壻意欲作勞見其病甚每日辱詬人教之餌膽礬丸三稜丸了不關涉鍼灸祈禳百無一濟戴人見之不診而療使服涌劑去積痰宿水一斗又以泄水丸通經散下四五十行不止戴人命以冰水一盃飲之立止次服平胃散等間服攢榔丸五七日黃退力

生益脾疸之證濕熱與宿穀相搏故也俗謂之金勞黃  
又朱葛周黃劉三家各有僕病黃疸戴人曰僕役之職  
飲食寒熱風暑濕寒尋常觸冒也恐難調攝虛費治功  
其二家留僕於戴人所從其飲餌其一僕不離主人執  
役三人同服苦散以涌之又服三花神祐丸下之五日  
之間果二僕愈而一僕不愈如其言

黃病七十二

蔡寨一女病黃遍身浮腫面如金色困乏無力不思飲



餌惟喜食生物灰裁之屬先以苦劑蒸餅為丸涌痰一  
椀又舟車丸通經散下五七行如墨汁更以導飲丸磨  
食散氣不數日肌肉如初

病發黃七十三

安喜趙君玉為掾省日病發遍身黃往問醫者醫云君  
乃陽明證公等與麻知幾皆受訓於張戴人是商議喫  
大黃者難與論病君玉不悅歸自揣無別病乃取三花  
神祐丸八十粒服之不動君玉乃悟曰予之濕熱盛矣

此藥尚不動以舟車丸瀆川散作劑大下一斗糞多結者一夕黃退君玉由此益信戴人之言

水腫七十四

南鄉張子明之母極肥偶得水腫四肢不舉戴人令上涌汗而下泄之去水三四斗初下藥時以草貯布囊高支兩足而卧其藥之行自腰已上水覺下行自足以上水覺上行水行之狀如蛇走隧如線牽四肢森然涼寒會於臍下而出不旬日間病大減餘邪未盡戴人更欲

用藥竟不能從其言

涌水七十五

李七老病涌水證面黃而喘兩足皆腫按之陷而復起  
行則濯濯有聲常欲飲水不能睡卧戴人令上涌去痰  
而汗之次以舟車丸瀆川散下之以益腎散復下之以  
分陰陽利水道之劑復下之水盡皆瘥

停飲腫滿七十六

涿郡周敬之自京師歸庶邑道中渴飲水過多漸成腫

滿或用三花神祐丸憚其太峻或用五苓散分利水道  
又太緩淹延數旬終無一効蓋粗工之技止於此耳後  
手足與腎皆腫大小便皆秘澁常仲明求治於戴人戴  
人令仲明付藥比及至已歿矣戴人曰病水之人其勢  
如長川泛溢欲以杯勺取之難矣必以神禹決水之法  
斯愈矣

濕痺七十七

常仲明病濕痺五七年矣戴人令上涌之後可瀉五七

次其藥則舟車瀆川通經神祐益腎自春及秋必十餘  
次方能愈公之疾不必鍼灸與令嗣皆宜涌但臆月非  
其時也欲俟春時恐予東適今姑屏病之大勢至春和  
時人氣在上可再涌之以去其根卒如所論

又一衲子因陰雨卧濕地一半手足皆不隨若遇陰雨  
其病轉加諸醫皆作中風偏枯治之用當歸芍藥乳香  
沒藥自然銅之類久反大便澁風燥生經歲不已戴人  
以舟車丸下三十餘行去青黃沫水五升次以淡齋滲

泄之數日手足皆舉戴人曰夫風濕寒之氣合而成痺  
水痺得寒而浮畜於皮腠之間久而不去內舍六腑日  
用去水之藥可也水濕者人身中之寒物也寒去則血  
行血行則氣和氣和則愈矣

又息帥病腰股沉痛行步坐馬皆不便或作脚氣寒濕  
治之或作虛損治之烏附乳沒活血壯筋骨之藥無不  
用之至六十餘日目赤上熱大小便澀腰股之病如故  
戴人診其兩手脉皆沉遲沉者為在裏也在裏者泄之

以舟車丸瀆川散各一服去積水二十餘行至早晨服  
薤白粥一二頓與之馬已能矍鑠矣

又崇谿李十八郎病腰脚大不伸偃僂蹇蹇而行已數年  
矣服藥無効止藥却愈因秋暮涉水病復作醫氏使服  
四斤丸其父李仲安乃乞藥于戴人戴人曰近日服何  
藥仲安曰四斤丸公目昏赤未其父驚曰目正暴發戴  
人曰宜速來不來則喪明既來則策杖而行目腫無所  
見戴人先令涌之藥忽下走去二十行兩目頓明策已

棄矣比再涌泄能讀官歷日調至一月令服當歸丸健  
步而歸家矣

又息城邊校白公以隆暑時飲酒覺極熱於涼水池中  
漬足使其冷也為濕所中股膝沉痛又因醉卧濕地其  
痛轉加意欲以酒解痛遂以連朝而飲反成赤痛發間  
止且六十年往往斷其寒濕脚氣以辛熱治之不効或  
使服神芎丸數服痛微減他日復飲疾作如前羣囊痒  
濕且腫硬臍下似有物難於行以此免軍役令人代之



來訪戴人戴人曰余亦斷為寒濕但寒則陽火不行故  
為痛濕則經隧有滯故腫先以苦劑涌之次以舟車丸  
百餘粒濬川散四五錢微一兩行戴人曰如激劑尚不  
能攻何況于熱藥補之乎異日又用神祐丸百二十九  
通經散三四錢是日僅得四行又來日以神祐八十粒  
投之續見一二行又次日服益腎散四錢舟車丸百餘  
粒約下七八行白公已覺膝罽寒者煖硬者軟重者輕  
也腫者赤退飲食加進又以涌之其病全瘳臨別又贈

之以踈風丸併以其方與之此公以其不肯妄服辛熱之藥故可治也

屈膝有聲七十八

嶺北李文卿病兩膝臏屈伸有聲剝剝然或以為骨鳴戴人曰非也骨不戛焉能鳴此筋濕也濕則筋急有獨緩者緩者不鳴急者鳴也若用予之藥一涌一泄上下去其水水去則自無聲矣李文卿乃從其言既而果然矣

白帶七十九

息城李左衙之妻病白帶如水窈滿中綿綿不絕穢臭之氣不可近面黃食減已三年矣諸醫皆云積冷起石硫黃薑附之藥重重燥補污水轉多常以初日易數次或一藥以木炭十斤置藥在鉗鍋中鹽泥封固三日三夜炭火不絕燒令通赤名曰火龍丹服至數升污水彌甚炳艾燒鍼三年之間不可勝數戴人斷之曰此帶濁水本熱乘太陽經其寒水不禁固如是也天水日高而

趨下宜先絕其上源乃涌痰水二三升次日下沃水十餘行三遍汗出周身至明旦病人云汚已不下矣次用寒涼之劑服及半載產一子內經曰少腹寃熱洩出白液帶之為病溶溶然若坐水中故治帶下同治濕法瀉痢皆宜逐水利小溲勿以赤為熱白為寒今代劉河間書中言之詳矣

濕嗽八十

趙君玉妻病嗽時已十月矣戴人處方六味陳皮當歸

甘草白朮枳殼桔梗君玉疑其不類嗽藥戴人笑曰君怪無烏梅罌粟囊乎夫冬嗽乃秋之濕也濕土逆而為嗽此方皆散氣除濕解急和經三服帖然効矣

瀉兒八十一

一婦年三十四歲夜夢與鬼神交驚怕異常及見神堂陰府舟楫橋梁如此一十五年竟無娠孕巫祈覘禱無所不至鑽肌灸肉孔穴萬千黃瘦發熱引飲中滿足腫委命於天一日苦請戴人戴人曰陽火盛於上陰火盛

於下鬼神者陰之靈神堂者陰之所舟楫橋梁水之用  
兩手寸脉皆沉而伏知胸中有痰實也凡三涌三泄三  
汗不旬日而無夢一月而有娠戴人曰余活婦人使有  
娠此法不誣

濕癬八十二

一女子年十五兩股間濕癬長三四寸下至膝發痒時  
爬搔湯火俱不解痒定黃赤水流痛不可忍灸燂薰搽  
硫黃藺茹白殭蚕羊蹄根之藥皆不効其人姿性研巧

以此病不能出嫁其父母求療於戴人戴人曰能從余  
言則瘥父母諾之戴人以銚鍼磨令尖快當以痒時於  
癬上各刺百餘鍼其血出盡煎鹽湯洗之如此四次大  
病方除此方不書以告後人恐為癬藥所誤濕淫於血  
不可不砭者矣

又蔡寨成家童子一歲病滿腹胸濕癬每爬搔則黃水  
出已年矣戴人先以苦末作丸上涌涌訖次以舟車丸  
瀋川散下三五行次服涼膈加朴硝煎成時時呷之不

數日而愈

濕慝瘡八十三

穎臯韓吉卿自髀至足生濕慝瘡大者如錢小者如豆  
痒則搔破水到則浸淫狀類虫行袴鞮愈而復生癩痕  
成凹一年餘不瘥戴人哂之曰此濕慝瘡也由水濕而  
得故多在足下以舟車濬川大下十餘行一去如掃渠  
素不信戴人之醫至此大服

泄瀉八十四



古郾一講僧病泄瀉數年丁香豈寇乾薑附子官桂烏  
梅等燥藥燔鍼燒臍熯腕無有闕者一日發昏不省檀  
那贈紙者盈門戴人診兩手脉沉而有力脉訣云下利  
微小者生脉洪浮大者無瘥以芩蒂散涌之出寒痰數  
升又以無憂散泄其虛中之積及燥糞僅盈斗次以白  
朮調中湯五苓散益元散調理數日僧已起矣非術精  
識明誰敢負荷如此

洞泄八十五

一講僧顯德明初聞家遭兵革心氣不足又為寇賊所驚得臟腑不調後入京不伏水土又得心氣以至危篤前後三年八仙丸庶茸丸燒肝散皆服之不効乃求藥於戴人戴人曰此洞泄也以謀慮久不決而成肝主謀慮甚則乘脾久思則脾濕下流乃上涌痰半盆末後有血數點肝藏血故也又以舟車丸瀋川散下數行仍使澡浴出汗自爾日勝一日常以胃風湯白朮散調養之一月而強實復故矣

又李德卿妻因產後病泄一年餘四肢瘦乏諸醫皆斷  
為死證當時戴人在朱葛寺以舟載而乞治焉戴人曰  
兩手脉皆微小乃痢病之生脉况洞泄屬肝經肝木剋  
土而成此疾亦是腸澼澼者腸中有積水也先以舟車  
凡四五十粒又以無憂散三四錢下五行寺中人皆  
駭之病羸如此尚可過耶衆人雖疑然亦未敢誚且更  
看之復導飲凡又過之渴則調以五苓散向晚使人伺  
之已起而繞床前後約三四十行以胃風湯調之半月

而能行一月而安健由此闔寺服德卿之昆仲咸大異之

又劉德源病洞泄逾年食不化肌瘦力乏行步欹傾面色黧黑舉世治病之藥皆用之無效適戴人治潁陽往問之戴人乃出示內經洞泄之說雖不已疑然畏其攻劑夜焚香禱神曰某以病久不瘥欲求治於戴人戴人以謂宜下之欲不從戴人名醫也欲從之形羸如此恐不任藥母已老矣無人侍養來日不得已須服藥神其

相之戴人先以舟車丸無憂散下十餘行殊不困已頗喜食後以檳榔丸磨化其滯待數日病已大減戴人以為去之未盡當以再服前藥德源亦欣然請下之又下五行次後數日更以苦劑越之往問其家彼云已下村中收索去也忽一日入城面色極佳語言壯健但怪其跛足而立問何故如此德源曰足上患一癩戴人曰此裏邪去而於外病痊之後凡病皆如是也

大便少而頻八十六

太康劉倉使病大便少而頻日七八十次常於兩股間懸半枚瓠蘆如此十餘年戴人見之而笑曰病既頻而少欲通而不得通也何不天下之此通因通用也此一服藥之力乃與藥天下二十餘行頓止

暑泄八十七


殷輔之父年六十餘暑月病泄瀉日五六十行自建碓鎮來請戴人於陳州其父喜飲水家人革爭止之戴人曰夫暑月年老津液衰少豈可禁水但勸之少飲比及

用藥先令速歸以菘荳雞卵十餘枚同煮卵熟取出令  
荳軟下陳粳米作稀粥攪令寒食雞卵以下之一二頓  
病減大半蓋粳米雞卵皆能斷痢然後製抑火流濕之  
藥調順而方愈

腹滿面腫八十八

蕭令腹滿面足皆腫痰黃而喘急食減三年之間醫者  
皆盡而不驗戴人以苾蒂散涌之出寒痰三五升以舟  
車丸瀋川散下之青黃涎沫幾半缶以桂苓白朮散五

苓散調之半月復舊矣



儒門事親卷六